

國朝畿輔詩傳

國朝畿輔詩傳卷五十四

長洲陶 樸 梟 薤 帽 任邱邊浴禮袖石校

李 燧

燧字東生號青壘河間人棠子官浙江下砂頭

場大使有青壘詩稿十卷

李光霽序先生天姿過人幼承庭訓工格律其
格律老成音調清越無題咏物諸體寄託深遠
復不失溫柔

敦厚之旨

董和培序青壘詩有玉溪之綺麗而不效其堆
聚有長吉之離奇而不涉乎險怪掃六代紛華
之氣追三唐

風雅之宗

隨園詩話同年李竹溪棠子燧歸河間後三十
餘年間消息不得今年在杭州遇李壻陳鴻舉

爲仙居令誦其近日句云體因慣病都忘蕪人不工詩亦自窮嗚呼才則猶是也而近狀可想矣

紅豆樹館詩話先生少侍竹溪太守官江南袁簡齋太史一見卽奇其才賦佳兒歌以贈旋訪高未堂明府於武昌戈太僕仙舟視學山右復相招入幕晚官浙西垂二十年其於詩也心契神解雖取法在晚唐而青蒼雄肆時闢開元大厯之奧五言佳句如木落千峯影江空一笛秋愁心當落日客鬢入新年雪明殘照冷山壓東雲凝江光翻石壁秋影下柴門身閒常惹病性癖不宜官海國山爲岸漁舟網作城舊書經雨漬老屋受風多古徑積黃葉秋陰生綠苔網收魚上市竿引鳴隨人柳橋三月絮春水一池蛙背藻思清音冷然可誦

蓬山吟

冷署無四鄰獨處山之陲屋後嘯山鬼簷間鳴老鷓木

葉打窗戶中夜風聲悲老屋耿疎燈主人方詠詩

我無民社責非僦須經營隨分自盡耳榮辱寧關情吏
胥抱案牘促我升公庭錯認是書齋高吟時一聲

五斗得療饑折腰亦自可糶散本性成終與世情左煮
海握牢盆會計愁瑣瑣長歌歸去來故我方是我

蠶費道中

策馬度函關崎嶇指前路俯視黃河流沙翻白日暮磨
隨行蟻旋壑任修蛇赴舉步愁土崩小憩足難駐深慮
黃沙埋高塞白雲度升天倏墜淵俯仰隨所遇嗟予千
金軀夙凜垂堂懼應險心忡忡違敢失故步斜陽已晡

微豁然就平陸回首千仞岡此身在何處

卿憐曲

韶光明媚嬌羅綺楊花搖蕩因風起化作浮萍亦有情
三生舊恨隨流水飄泊紅顏暗自傷廿年兩度閱滄桑
侯門歲月渾如夢回首春風枉斷腸姑蘇臺畔如花女
初嫁王昌年十五夜月教吹碧玉簫舞腰輕鬪黃金縷
黃金作屋玉爲鈿憐卿轉自倩卿憐那知轉瞬成塵劫
金屋凋零玉化烟傾城誰把珍珠換通侯年少人爭羨
芳信遙通鳩鳥媒粉痕初拭何郎面綺閣遮雲火道斜
武安甲第逞豪華拚將壯歲調羹手妝點中朝宰相家

風光到眼仍如故。雕闌芳障重重護。錦佩光搖明月珠。
玉階穩稱蓮花步。瑤臺合住許飛瓊。疎箔玲瓏涼水晶。
樓上花枝矜綽約。鏡中鸞影照分明。仙姿易惹羣芳妬。
閒愁脈脈憑誰訴。吹殘風信太恩恩。閒殺碧桃花一樹。
相公才思孰能傳。領袖鸚鵡班第一。流歌扇舞裙爭獻媚。
銅山金穴鎮持籌。錦屏十二雲鬟簇。華筵夜夜燒高燭。
擬把良宵有限歡。盡消人世無窮福。身世何曾自忖量。
後車那管前車覆。一聲驚落玉搔頭。舉室倉皇泣楚囚。
離魂舊冷烏衣巷。斜日新關燕子樓。封侯頓醒黃粱夢。
也知召罪邱山重。執法宜嫌瓜蔓抄。鳴岡爭賀朝陽鳳。

西曹咫尺路迢迢
零亂殘魂不可招
那許癡情分賣履
枉拋心計積胡椒
可憐寂寞春宵永
猶認熏香侍早朝
人生富貴如朝露
阿儂苦被繁華誤
早識冰山一樣消
何如生小蓬門住
鳳泊鸞飄痛不禁
鄉關迷望更牽情
纏絲絮語愁中句
欵乃輕舟夢裏聲
天上人間疑隔世
閱來興廢都成例
蒼狗雲衣一霎空
紅綃賸有傷心淚
金谷園中事渺茫
白雲亭畔月蒼涼
呢喃卻羨營巢燕
猶宿朱門舊畫梁

過成皋

峻坂百折走成皋
崇岡疊嶂何岩巖
堯畫破青天一條碧

兩崖壁立圍周遭行人魚貫塞其內車如俯仰心搖搖
井蛙觀天宇宙小羣蟻走磨盤旋勞峯迴徑轉路中絕
惟聞鈴鐸聲聲敲祇愁狹路馬首撞洞中蠻觸誰能逃
英雄割據利守險虎牢舊址撐山坳楚漢遺事幾千載
雄圖過眼雲烟消簡書促我行日夜關山兩月驅征軜
無復餘情更弔古一鞭斜日風蕭蕭

九日同李晴軒叢臺登高

磴道倚荒城叢臺舊有名河山銷霸氣木葉亂秋聲
雲淨千峯瘦天空一雁橫盍簪逢令節好結歲寒盟

泮池道中

策馬邊城路崎嶇石徑危塞山常似睡關柳不成絲雨
漬征衫膩寒侵病骨支故園春色老已是落花時

雲中卽事

匹馬臨狐塞關山恣壯遊暮雲連嶽色歸夢繞河流鼓
角三邊靜風烟五月秋蓬蹤原是寄何事戀并州

渡江

潮湧遠山奔蒼茫接海門烟光沈夕鳥風信拜江豚浪
濶千帆小雲低一塔尊漸看瓜步近烟柳幾家村

宿州

小市長橋畔荒城夕照邊沙平初過雨柳禿不生烟旅

食方炊黍河流半浸田閭閻多菜色生計總堪憐

新春

春風隨旅客一夕到天涯故國經年別寒梅隔歲花雲
埋山嶺雪潮濤海天霞節物催人老驚心兩鬢華

閒居

半畝幽棲地窮年老病身有書能免俗無藥可醫貧風
雨尊前淚鶯花夢裏春扁舟雲水外擬作五湖人

有懷

萍蹤任來去舊夢已難尋昨夜雁鴻到寒江烟水深美
人不可卽雲樹渺予心惆悵西風急蕭蕭葉滿林

甘肅道中

老負鹽車困長歌行路難地形分隴蜀山勢接皋蘭土
裂千尋澗天圍一線寬霜風寒透骨誰念客衣單

題兗州城樓

五字傳千古層樓望管窺乾坤雙眼濶海岱一痕青東
郡留鴻爪西川老客星倚闌憑弔處有客歎飄零

寄袁簡齋先生

韋司風味陶潛節野鶴閒雲伴此身四海聲名雙管筆
六朝花柳一家春鬚眉每向詩中見函丈時從夢裏親
閉戶著書深幾許瓣香心事屬何人

題桃花扇樂府

滄桑興廢恨無窮都付云亭曲調中南渡江山存野史
西京禾黍變王風箋銜燕子新詞麗血染桃花別樣紅
裙屐風流消歇盡銅駝荆棘雨空濛

飛來奇貨大江頭草草朝廷御氣浮調燮陰陽資肉食
指陳綱紀笑併優多搜玉帛藏郿塢祇管鶯花選莫愁
瀟灑阮生頻入幕羊頭羊胃盡封侯

光祿重司御苑春東林往事足傷神初經烽火淪宗社
又見殘碑記黨人盡日延年翻別調當時江令遜才臣
江沈鐵鎖無人問玉樹瓊花色色新

東南王氣付長流江上烽烟入望收
燕鎮何心恢祖撥廟廊終日計恩仇
唐基興復思光弼漢室艱危仗武侯
主將清風惟坐鎮空傳開府領揚州

干戈滿目慘愁顏冷落燕城夕照間
誓把寸心迴日月難將一木障河山
深宮徹夜笙歌細征袖臨風血淚殷
白馬寒濤向東去殘軍零亂幾人還

樓船已近石頭城宰相何書醉裏驚
只慮漢陽來勁旅律忘淮北但空營
半江戰血千秋咽六代烟花一夢醒
莫問盛南舊時事怒濤東卷恨難平

登武昌城晚眺

木葉無邊下洞庭秋光已老暮烟汀江天渺渺迷歸棹
雲樹層層列畫屏三楚波濤浮大地九疑風雨泣湘靈
離情都付梅花笛惆悵遙峯數點青

雁門道中

雄關巍峙一峯尊廣武城荒故壘存卷地遙驚邊吹急
衝寒難仗敝裘溫雲連山勢圍狐塞沙擁河流下雁門
客裏不知春色暮滿天風雪暝烟昏

旅夜書懷呈劉雲岡

歸心休問大刀頭千里雲山作壯遊浪蹟重騎燕市侶
邊聲初度雁門秋三生舊夢渾難記甘載生涯半是愁

已分蓬蹤隨去住漫憐賈島客并舟

感懷

關山風雨愴離魂難覓冥鴻舊爪痕辛苦窮年形漸改
妻孥一笑舌猶存誰憐病渴文園瘦始信金多季子尊
破屋三間書萬卷已拚烟月老柴門

清宵

清宵背影攬貂裘
數到寒更第幾籌
早歲壯懷隨日減
長年老女對人羞
春光荏苒渾如夢
詩骨清寒總帶秋
廿四番風吹易盡
一天涼雨替花愁

喜晤戈寶之撫時感舊率成律句卽寄呈仙舟先

生

鷺地相逢在此宵，霜風瑟瑟夜迢迢。
懸知鴻爪痕難記，猶賸青衫酒未消。
老屋寒燈聯舊雨，亂山殘夢隔中條。
使車三載追隨處，惆悵花朝與雪朝。

寶應道中

卅載江鄉繫夢思，風光回首舊遊時。
溪灣老樹曬魚網，屋角夕陽明酒旗。
陳蹟已迷鴻印爪，清流空照鬢如絲。
行行漸覺維揚近，一帶隋堤柳萬枝。

吳門卽事

橫塘烟景暫勾留，簾卷明河一片秋。
雪蕊豔堆雲鬢膩

碧波輕泛櫓聲柔
月低畫檻停遊舫
星爛紅燈射酒樓
惆悵鄰家歌一曲
蕭蕭暮雨使人愁

會亭道中

木葉微疎水漸波
驚沙湧浪走長河
農家種麥耕田早
村店逢人說餅多
遠道征塵淹歲月
故園秋色老烟蘿
壯懷縱有封侯願
祇恐黃梁夢屢訛

過洛陽

荒烟何處認銅駝
立馬西風雁影過
洛下轉輸勞歲月
天中形勢壯山河
三秦孔道軍書急
五夜邊聲畫角多
賈誼經時饒涕淚
那堪年少屢蹉跎

潼關道中

曙色微明曉月涼
笳聲吹散一天霜
平沙悵望人千里
匹馬遙隨雁一行
風捲塞雲塵漠漠
秋凌關樹影蒼蒼
今年又負黃花節
何處登高望故鄉

同家三兄星巖宗弟青橋都門守歲

宜春裁帖紀年華
冉冉流光一瞬除
埽徑雪留殘歲蹟
背風燈灺隔年花
浮蹤到處渾如夢
此夕何人不憶家
贏得生涯拚一醉
彩幡簪帽任敲斜

久不接三兄書詩以問訊

一別春明半載餘
客中消息近何如
懸知世事真難料

始信長安不易居南浦飛花人去後西堂涼雨夢回初
江鄉秋水多鴻雁不見平安一紙書

旅中九日

一夕鴻蹤許暫留瀟瀟涼雨不勝愁孤村濁酒酬佳節
古驛寒鐙夢舊遊九月霜華霑旅鬢十年塵土漬征裘
故園三徑今何似辜負黃花幾度秋

臨淮館舍與豐介莽夜話

永夜聯牀話舊盟疎銚雙照影淒清憑誰肝膽酬知己
老我艱難閱世情千里關山孤客夢九秋風雨大河聲
朝來更踏西征路行過江南第幾程

嘉禾道中

垂柳柔柔夾岸生
人來苔鬢眼初明
秧田戽水山穿隴
魚鱗觸舟時有聲
樹影初圓常卓午
湖光一碧漾新晴
舊遊更訪秦淮渡
好趁南風五兩輕

重陽日接劉然園書賦此卻寄

離魂消盡海東頭
異國風烟怕入秋
千里鄉關勞遠夢
四山寒雨聚危樓
聲驚白雁催霜信
影瘦黃花伴客愁
爲憶征袍西去日
幾從天際認歸舟

龍山秩滿量移鶴砂撫事述懷率成四律留寄四

明諸同人

萍蹤吹散太怱怱五尺蒲帆一夜風那有聲名留海嶠
爲思鱸膾去江東生涯已分喫巢窠舊蹟難尋爪印鴻
記否花間題句在他年可許碧紗籠

吳淞烟雨片帆斜人到江南正落花刷羽喜同鶯遊樹
將雛忙似燕移家幾番風信春光老十載蓬山客夢賒
回首四明多舊雨暮雲芳草隔天涯

何曾出莢有經綸膏雨難留去後春顰影已非初嫁女
迷津須問過來人重開局戲翻新調莫向雲泥證夙因
聞說催科問日少也應料量苦吟身

一肩襍被別西冷望斷遙山一抹青遂隊久甘人碌碌

酬恩休看鬢星星虛舟去住原無意世路艱辛已慣經
猶憶龍孫親手植好留清蔭滿中庭

臨平道中

幾疊林巒入眼頻臨平風景入新春經年客况少佳趣
對面青山如故人日上遠村烟曖曖雪消新漲碧粼粼
勝遊指點湖山路淺草沿堤綠未勻

都門晤琴川從叔贈詩

十年聚首各華顛殘臘恩恩月正圓小座團圓人似夢
孤燈風雪夜如年王門莫售千金璧故業難拋一稜田
自是長安居不易歸來珍重舊青氈

商邱道中

伶仃匹馬怯長征，行近梁園路漸平。
遠樹連雲橫夕照，驚沙激浪壯河聲。
勞人自笑空皮骨，津吏何煩問姓名。
愧我本無經世策，漫愁凋敝計民生。

吳門雨泊

瀟瀟暮雨睡騰騰，舊夢重尋百感增。
屐齒聲喧沽酒市，波光紅漾過橋燈。
孤樓形影清於鶴，涉世情懷冷似冰。
好待爛開秋正曉，九峯晴翠指松陵。

舟夜

中宵篷韻響琤琮，耿耿疎燈照影紅。
垂老萍蹤仍泛泛，

殘年歸棹去，怱怱重衾遠。夢三更，雪孤枕，篷窗一夜風。
計別春明，經五載，鄉心迢遞，逐飛鴻。

傾脂河

傾脂好上五湖舟，顧影妝成一鏡留。勝地署名多附會，
美人遺蹟總風流。采香人去花含淚，響屧廊空月似鉤。
祇有潺湲河畔水，年年春漲膩如油。

過睢陽題雙忠祠

遺像鬚眉凜，雙忠姓氏留。滄桑經幾變，節義重千秋。
時事傷天寶，倉皇幸益州。沙蟲憐士卒，俘馘笑王侯。
張許扶皇運，東南控上游。指戈回落日，隻手障狂流。
欲整殘

棋局難爲肉食謀孤城危累卵鄰境尙歌謳四面援軍
絕千堆戰骨稠茫茫邊月白莽莽陣雲浮一任天難問
休傷命不猶析骸供饗士殺妾當椎牛智士無全策將
軍有斷頭一腔揮熱血六射不回眸保障江淮勢成全
郭李猷公非明大義孰與奮同仇報國身終殞成仁志
已酬忠魂同廟祀故宅認荒邱縹緲靈旗捲淒清過客
愁誰家吹短笛斷續傍高樓

卽目

望望下平岡驚蓬飛曠野枯柳驛門前夕陽眠病馬

途中清明

幾行邊柳若爲情石徑崎嶇匹馬驚怪底鄉心鎮撩亂
雁門風雪過清明

吳江道中

朝來一雨淨秋容幾疊輕雲淡遠峯高枕篷窗人未醒
帶將殘夢過吳淞

吳門感舊

兒童轉眼鬢毛摧塵夢三生喚不同自笑身爲丁令鶴
河山如舊我重來

汴京懷古

衰草平田一片秋烟花何處認樊樓祇餘河畔蕭蕭柳

和雨和風送客愁

燈火樓臺夜夜新
勾闌歌舞奉丹宸
傷心雪窖冰天外
猶有餘情傳美人

殘春

殘春無處不消魂
錦瑟年華斷夢存
門掩落花簾拂地
斜風細雨坐黃昏

雙橋夜泊

吳頭楚尾路迢迢
戍鼓漁燈伴寂寥
深柳四圍樓一角
孤帆涼雨泊雙橋

平望遇雨

匹練橫空日氣消
菰蒲葉戰風蕭蕭
一聲雷送太湖雨
七十二峯雲擁潮

赴汴

茗霽烟波送去舟
西湖風景漫勾留
此行應被青山笑
拋卻杭州赴汴州

錫山道中

水仙祠畔水泠泠
裊裊垂楊十里亭
一葉風帆留不住
九龍山送滿船青

李景潞

景潞字石友號子耆景州人諸生

朱晚序先生尙義氣重交游所交皆四方名下士詩根柢深厚不事雕琢而法度悉合古人

秋雨

雲掩空庭暮涼生酒力消三秋何寂寞一雨更蕭條
蝶夢和花冷蛩聲到枕遙兒童不解事昨日種芭蕉

揚州

舟過淮陰幾日程烟花又見廣陵城繁華從古何曾易
春恨撩人不覺生隄上柳飜千縷晚當頭月是二分明
河干小住恩恩去輪與樊川載酒行

康堯衢

堯衢字道平號達夫天津人貢生有海上燕人

稿十二卷津門風物詩四卷

津門詩鈔公博稽今古於詩力爲講求孤介伉直人不可意面詆之無所避亦以是坐囹年六十餘

卒
正月十六日雪

佳節今猶是雲凝雪意酣閒庭飄落絮春酒罷傳柑
鏡滅千家興梅輪一笑探懷人結遙想清夢在江南

春日石橋晚步

行吟忘日暮橋外踏平蕪水漫東西淀春生大小沽
好風吹不定高柳意全蘇歸路頻回首斜陽淡欲無

九日同郝石臞登樓

極目高樓上，闌干俯大河。年華秋又老，風雨夜來過。遠色碧山暮，寒聲黃葉多。愁心向朋侶，不醉欲如何。

山行

驅馬下石梁，落日峯巒碧。山家早閉門，惆悵虎行蹟。

姜家園

柳墅荷池事已休，外家別業感春遊。惟餘一片荒園地，冷雨寒烟只牧牛。

送人之江南

一葉輕舟趁暮潮，白鷗飛去水迢迢。相思他日橫塘路，人在春風第幾橋。

春日懷查次齋先生

鞭絲帽影未堪攀
兩載相思何日還
眠破梅花春晝永
懷人清夢落燕山

燕郊題壁

蘄州纔過又通州
匹馬斜陽古市秋
擊筑高歌人不見
西風吹下酒家樓

張頰

頰字睦庭號仲亭
景州人貢生有寒
筍山房詩

一卷

曹耘皋自閩中罷歸病中往訪

蒼寒欲雪天荒烟壓村落驅車扣柴荆駕言尋舊樂八
載睽君顏相逢互貽愕涼亭憶聚首夢寐忽如昨我已
非盛顏君髮蒼如鶴攜手登草堂殷勤勸杯酌兒女粲
羅列茶湯爲親滄想君愿宦海亦曾縻好爵誰謂綺與
紙而能安澹泊更出一卷書言是別來作世態幻媿妍
行蹤足印壑忽簪天女花忽淬干將鐔體物析洪纖名
理祛糟粕正如翳桑夫開眼飽羹臠况值憂采薪快愈
頭風藥我亦癖嗜癖納履踵每削近參不語禪執筆如
雞縛撫卷對寒山冥心向寥廓世味淡如許至樂生寂
寞高歌歸去來努力甘藜藿

心紅峽

路入心紅峽幽深一徑迷客心驚虎嘯鄉思怯猿啼雲
影千峯合泉聲萬木低武陵殊未遠何事獨栖栖

雙燕

旅館憐雙燕翻驚別恨新多情尋故壘無計戀殘春辛
苦同爲客殷勤獨傍人遙知深閣裏寂寞已經旬

抵洛陽呈家兄

十八年前地重來路尙迷時經春社後人在漢陵西道
路悲萍梗風塵誤馬蹄鄉思正蕭索何處又鷓啼

二里關

二里關頭路崎嶇攬轡行孤峯拔地起狹路與天平風
雨經三月雲山第一程潺湲北去水常使夢魂驚

鳳嶺

尺五蒼蒼近岩堯古道縣野花新雨後孤戍亂山前樹
密疑無路雲開忽有天何當披薜荔長嘯碧峯巔

山中雜吟

亂峯圍古戍一徑入溪聲地狹崖邊宿田高樹杪耕曉
烟然翠竹夜雨飯黃精風景行如此應知客裏情

褒城縣

南下連雲棧山城氣象開頽峯虛漢壘曉日上秦臺市

小爭蒹葉田稀闢草萊客行春色盡悵悵隴頭梅

七盤嶺

回首長安遠驚心蜀道難春隨流水盡雨滯客衣單樹影峯千仞雲屯嶺七盤垂鞭愁更怯不敢倚危闌

古意

郎在江上行妾在舟中坐愁心江水流雙槳打不破

采蓮曲

蓮生汙泥中水寒不可采欲覓蕩舟人風帆不相待持刀斷碧藕藕斷尚有絲持刀畫流水水流無絕時芳華能幾時零落委秋水不畏風與波畢竟得蓮子

喬耿甫

耿甫字默公號五橋天津人諸生有僑樵稿

津門詩鈔五橋善書神似淳化閣帖能以絲濡墨作擘窠大字人以爲奇性疎狂不拘行檢年六十餘貧瘠以死

懶

倚杖舍南立西風吹颯然斜陽半村水高樹一聲蟬近
與村夫約言耕隴上田侵尋成懶病搔首愧華顛

秋日過王大侍御故居感賦

門對城隅落照開王郎驄馬幾曾來廿年前事猶能記
小院黃花共舉杯

冬日偶成

土牆茆屋便爲家一任妻孥笑語譁
寒竹小瓶三五葉試憑引夢到梅花

喬樹勳

樹勳字六橋天津人耿南弟諸生有六橋詩鈔

津門詩鈔六橋與兄五橋俱有才名五橋以嗜六橋以詩一時津門有二橋之稱六橋鬢眉冷古趣嗜酒往往醉不知人睡臥河干大木上霜華滿髭過者笑之自若也

思歸

河干不覺暑雨過藕花香雲影下平楚
潮痕帶夕陽摘瓜秋令近驅犢牧人忙去去吾何事行吟到故鄉

與汪蘭階夜話

黃葉落空庭西風下二更古人不可作我輩尙勞生白
眼當年癖青燈此夜情還須各努力且莫賦秋聲

旋行口號

身外皆白雲眼前盡滄海薄酒不醉人秋風吹欵乃

王延襄

延襄字子陽武清人諸生有老圃詩稿

李雲章序老圃借文安紀丈曾藻遊廣西後困
不能歸課徒自給遂聚于桂林而家焉詩文宗
法杜韓才力特健先龍州公嘗云王生之筆如
其爲人雄直古樸無一絲側媚氣是可敬也薦
爲李松圃先生掌書記居水東門逍遙樓畔小
閣面山圖史羅列有以娛老不復思故鄉矣乙

亥子去桂林後數年間
君與令子相繼下世

題李子文秋帆烟雨圖

疎雨鳴空江烟帆去如撇中有素心人蓬窗意孤子持
縑繪爲圖捉筆怒猊抉層塔挂飛雲江水流澈冽蔽虧
黃葉村秋墅背山結豪吟詩句新庾鮑鼓成列淵澄瀉
心源滔滔瓶不竭文字與神會把玩情獨契知君負奇
氣蟠屈吐雄霓長風破巨浪騎鯨探禹穴林壑興偶然
亦用自怡悅古峭洗鉛華淡逸淨冰雪想像落腕初胸
次迴高潔在昔李營邱超妙與俗別跌宕若有神毫端
驚電掣君才繼厥後精詣肱三折泉石寫幽趣真宰關

靈訣我家東澗頭山水貌清絕讀書愜夙歡寒溪甘可
啜渴來八桂林萍綠歸卞薛客心逐秋風蹄泔困跛龍
何因抱此卷揚帆聽鼓柁歸去作佳賞廬臥西山缺

讀李予文詩稿卽送之北歸

玉溪昌谷崢嶸氣懷麓空同磊落懷直溯開元探魏晉
始知元白是淫哇

廉吏家風北地傳少年才調已如仙騎鯨從此朝天去
更灑泥金九萬賧

張奎震

奎震字文甫南皮人諸生

秋夜讀書

秋深催漏永，翦燭夜繙書。
乘興渾忘寐，雜聲出草廬。

王詒

誥字奉聞號丹亭，肅宜人諸生有相李草堂詩

稿

題畫

隱約枕江城外頭，客帆歸泊蓼花洲。
斜陽欲落潮初起，水色天光一派秋。

一枕琴書午夢回，蕭然庭院少人來。
桐陰湧碧畫飛鼠，浦磬遙傳山寺閒。

李耀祖

耀祖字榮先號貽堂安肅人官江南宿遷縣知縣

詠古槐

種植知何代華滋蔭寺門幾重蒼蘚合百尺綠雲屯蟬噪高枝靜鴉棲古徑昏甘棠戒勿拜留共此長存

國朝畿輔詩傳卷五十四

終

國朝畿輔詩傳卷五十五

長洲陶

樛嶷薌輯

慶雲雀

旭曉林校

邵葆祺

葆祺字壽民號嶼春大興人大業孫嘉慶元年

進士歷官吏部稽勲司員外有司勲存稿與卷

隨園詩話壽民年二十四歲舉孝廉讀余詩話

見寄云奇才不料人還在妙論都如我欲言懶

有奚囊收拾盡世間多少未亡魂

張問陶贈邵壽民詩長爪郎玉川子詩中作開

闢不止忽歌忽哭忘其死當其下筆時與會忽

賤舉離離奇奇不知作何語或嚴如天神或麗

如好女或如錦繡投或如黑風雨如鬼叫墟墓

之欲殺欲割疑神疑鬼心雖不能服聽之殊麗

灑我亦付之可解不可解譬如然犀一照妖魔
駭今人有卻五欲敵古人古終日遊醉鄉詩隨
酒氣吐左三升右一甌閉門吃笑對客蹲躡
舞醉中往往發奇典一句兩句頗學馬異劉義
恣笑侮聲裂五月雷力破千鈞弩嗟狂生在
幾于武夫武世人咄咄痛罵呼之爲怪物竟將
揮之天外不許爲僑伍昨日扣我門對我氣消
沮自傷句奇語重大不理于口欲我創爲新論
大張旌幟爲之輔不知皇天雨粟羸生乳我爲
空言亦何補笑沽酒一壺佐之以棗脯勸君無
太奇太奇徒自苦君今負此才神勇自可賈何
不或解歌利王大振金剛杵禹鼎神姦亦須鑄
虞廷琴瑟亦須臚以任華學杜甫援楊墨入鄒
魯倒滿天河澆肺腑先使腎腸心腹歷歷清可
數然後坐拭鞞鏡靜照九州土使彼五蟲萬
怪攝入清光俱不腐好句從天來倘來亦無阻
不必手持牛耳爭作騷壇主消遣百年身亦足
忘寒暑胡爲乎攢眉閉目苦咽菖蒲藟不食人
間未與黍君詩似我詩幾不辨爾汝如以毒攻
毒毒大恐成蠱願君爲麟莫爲虎麒麟來虎如

鼠

紅豆樹館詩話壽民與張船山太守友善船山
題其詩集比之長爪郎王川子又曰我愛君詩
無管束忽然兒女忽風雲今觀君詩頗雅令妥
貼斤斤矩矱不甚頓驅險句也君先世系山浙
之餘姚二雲學士於君爲叔父行
嘗受業門下蓋深得其指授云

敗寺

廢鐘蝕不鳴空簷岑碧瓦佛髻拱懸懸講堂臥牛馬殘
僧瘦如腊階蝨紅牆下

古意

越溪女兒美如玉自矜顏色嬌妝束幽艷何須時世誇
含愁卻向傍人訴自言生小十歲時低首窗前學畫眉

十二偷寫簪花樣鄰家姊妹羣推讓十三解誦長恨歌
索值十萬非云多十四隨耶大同去白草黃沙亂心緒
阿耶零落阿母歸歸來杳杳家何處鴉啼晚風鶯啼雨
展轉今年年十五阿母憐儂早上頭卻忍將儂嫁俗父
郎家不是讀書家生平未見江南花蒼涼心事妾難說
黯淡梳妝人漫誇君不見東家秦氏羅敷女巍巍自倚
金吾壻又不見西家小妹劉碧玉嫁得汝南矜多福阿
母有心憐愛儂何不東家喫飯西家宿

秋日招張船山檢討詣市樓飲酒

銀河夜洗長空潔酒旗拂拂翻雲出酒人此際不勝秋

招要同作城南遊城南酒肆紛無數遙指長安第一處
上客如逢衛巨山老傭似喚丁都護琉璃光合眞珠圓
玫瑰露滴薔薇鮮攜來杜甫錢三百壓倒新豐斗十千
君不見千步廊前萬人走車如游龍馬如狗馬聲蹀躞
人聲遙塵沙不入酒徒口張郎醉後興狂逸舉杯徑向
乞兒揖我醉只求囊底眠不知倒載羸車還月茫茫花
冥冥天風吹人人亦醒卷幃更共山妻飲秋蟲滿地鐙
花冷

驅駱馬圖歌爲船山太史作

有序

船山得畫馬一幅前腕間有二小足如枝指然

詢家二雲先生始知名駉駉出爾雅所謂枝蹄
跡善陞馱也駉駉外國名蓋異種云

古人畫馬窮殊態馬有枝蹄誠足怪不熟元公爾雅篇
那知是有駉駉在畫師畫肉兼畫神宋元筆妙追唐人
蹄高臆濶雄姿竦屹立如山不可動白帽蠻奴結束奇
訝渠亦是駉駉種君不見七尺爲駉兮八尺龍倨牙爲
駉兮有力駉房星墜紙上萬古光熊熊遂令世間凡馬
爲之空漆城蕩蕩不能上一躍橫過數千丈矯然直欲
飛上天下視驂駉駉駉局促皆堪憐乃知畫工極意爲
添足如使萬里之才飛食肉瑰奇不讓犀三角神異還

同人四目漢舍人居隄爲考訂羣馬非傳疑今之畫圖
乃宛合可惜茫茫燕市無人知張公馬癖如支通常拈
秃筆抒情性能畫方知畫手難顧茲能不誇神駿我昔
鳴鞭塞上過十年壯志未消磨試將曹霸丹青引更譜
天山勅勒歌

己未正月十八日書事

一掃雲霾蹟青陽氣萬重炎威初寂滅天罰尙寬容猶
勝然臍敗爭看繫頸從宏羊烹此日會待寢邊烽
詔獄綸扉去驚傳赤棒呼聞收大丞相如縛一庸奴北
寺通侯泣面曹法吏趨卻留吟句在解歎月輪孤

彷彿黃頭餓隨身無一簪苦依幽室冷愁戀畫堂深七
尺珊瑚樹千叢珠玉林粉侯仍
賜宅故第不堪

尋

覆壁金難揜重幃玉亦殘生營石翁仲死斂白衣冠鈔
豈同瓜蔓喪惟賸柳棺淒涼蕭寺裏鬼火不禁寒

未亡應亦族僥倖武安侯專閫鞞刀誤分茅帶礪優

恩原推肺腑功詎出兜鍪羯末材尤下隨人作楚

囚

投匭紛如許螭坳儼牙衣 宮中三篋滿檻外一燈微

此日簡章密當年封事稀曹唐已仙去身後有光輝

途中憶張船山卻寄

單車東去一鞭遲
萬樹殘陽滯雁時
懷友每繙西晉傳
悲秋似讀晚唐詩
相看癖性俱耽冷
除卻狂吟百不宜
更羨張郎多慧福
漱金花下畫雙眉

抵海豐數日三兄適詣郡未歸悶成

背倚吟窗數過鴉
訟堂岑寂似山家
霜痕著樹疑殘月
海氣蒸雲作晚霞
十丈風沙催柿葉
百年臺榭憶桃花
居人苦望深秋雨
待撥東阡透麥芽

寄懷王施圃

炎風五月到涼州
萬壑寒冰作水流
瀚海功名難入夢

邊城鼓角易驚秋人當出塞須橫劍客爲思鄉願上樓
此日題詩憑寄遠不知君正憶吾不

九月十九日送沈見亭舅氏下第南歸

不耐填胸萬斛塵挂帆歸去夢嶙峋離亭且展重陽酒
秋氣偏鍾下第一人十上才名千古淚半生飢走一家貧
要離冢畔眞娘墓賸有狂歌動鬼神

感興

酒酣斫地莫悲歌作健其如興嬾何漸覺名心經世淡
頻驚衰宦出山多愁聲入夢蛩初出涼意迎秋雁未過
塵市閉門休訝我近來耽病學維摩

感懷贈眉州彭田橋秀才

情懷懶漫氣嶙峋，最怕元規汚面塵。
拊脚常疑中有鬼，掉頭頗訝側無人。
眼前君是長身鶴，世外誰爲獨角麟。
爭怪瘦吟如島佛，殘盃祇共一盃親。

過二雲叔雙藤窠舊居有感

故廬重過輒沈瀾，幾爲中朝惜史官。
甲第人多徵辟少，玉堂才易著書難。
空傳絳帳流風遠，猶賸藤枝壓雪寒。
預恐花時倍惆悵，夕陽紅處儘誰看。

送洪稚存遣戍伊犁

曾披短疏獻楓宸，剴論終歸血性人。
事本風聞仍愛

主意甘 天譴早忘身密函爭訝投書客諫史

應傳珥筆臣去去荒沙誰引手都門相送賸沾巾

奎斗光搖貫索寒詩人原具鐵心肝似因徵辟來千里
轉爲聲華誤一官蕭寺無人風撼撼重關有路雪漫漫
汗顏幾輩誇名士坐論從容抗疏難

僕去口號

又作銜泥計淒涼欲斷魂可知堂廡下不是舊朱門
夢吟首二句寤而續之

再收殘影去人立暗花中道得眼前景方知鬼語正

晴

惻惻微寒逗午晴倚牀茶罷睡初輕綠槐陰外蟬如磬
管領秋來第一聲

過趙北口

數行禿柳冷蕭蕭敗萩凝霜凍不搖記得買魚溪市裏
夕陽又過十三橋

夜聞塔寺鈴聲

塔爲唐時建

三千梵鐸凌空語霜氣初濃月影昏卻似唐朝舊宮女
夜深和淚說開元

牛堦

堦字靜涵天津人嘉慶三年舉人官山西平魯

縣知縣

重過趙州橋

我來楊柳正飛花
客裏逢春感物華
今日重過橋畔路
麥黃風暖綠陰斜

金象豫

象豫字如之一字介公任邱人嘉慶三年舉人

官山西趙城縣知縣

金鑑先府君行述府君幼敏異經史過目不忘
丙午中副車丁巳考充武英殿校錄凡一書
成卷帙浩繁日讐對不辭勞瘁戊午中式議叙
知縣甲子選授山西趙城縣平霍一帶歲大飢
府君請諸上官趙邑得賑四境賴以全活無逃
亡焉丙寅夏不雨設壇致禱甘霖立沛邑舊有

倉廩地處卑溼貯穀易霉變
捐俸別建乙亥卒年四十八

過宋老生墓

老生昔戰死瘞骨此山阿
晉水初傳檄孤城自奮戈
疾風知勁草桀犬觸湯羅
南望河中守千秋而不磨

謂素君

劉耆德

耆德號竹西寶坻人嘉慶三年舉人

題王六橋游盤紀畧

雲水松風細品量
好將巖壑貯奚囊
可曾一試雕龍手
鐫上奇峰怪石傍

紀淦

淦字秋水號幼海文安人曾華子嘉慶三年舉
人官山東萊蕪縣知縣有豆花齋詩集一卷

紅豆樹館詩話秋水在官務行實惠萊民德之
歿之日士名賻送者相屬於道性復廉介家無
餘貲妻子流轉津門賴梅樹君廣文時加矜恤
並爲收其遺稿君蚤負文譽尤工于詩造格道
勁出語幽潔短律長歌悉臻精妙文
安紀氏能詩者十餘家必以君爲冠

湖上

涼風紛菡花空濛半城水何處房公池遠山淡蒼紫斜
日深巷中長笛迢迢起

明湖橋南是百花洲舊地懷李滄溟

叢樹滃晴雲朝陽鬱烟井偶過明湖橋涼波澈清影遺

躡繩前哲古調心徒取燕燕語雙飛高樓委荒景獨有
白藕花秋來開數頃

文安女

有序

葛怡堂言邑辛酉災後鄉民多賣兒求活奴犢
升米僅數日食山東巨猾挾重貲來購農民某
氏女及笄有姿色家數口垂斃女請行談笑別
父母及去至中流望鄉遙拜拜已遂赴水死怡
堂約作詩紀之不果棣州無事作此怡堂述時
忘其姓氏故以文安女名篇

澗澗溝中泥皎皎機上苧三五顏如花文安小家女太

歲在辛酉魚鼈逐人食河北爲比鄰飢骸滿澤國無地
掘草根少錢買漁舸三日斷炊烟阿爺倚門坐出門水
茫茫入門天蒼蒼弟妹索餅啼阿娘傷中腸阿爺視女
吁阿娘視女悲生女不如男負米他鄉陞峩峩大艚來
言是山東豪左顧擁錦紉右手持錢刀里黨妖冶兒牽
臂出茅屋朝沐登客舟暮釜烹牛肉敢惜女兒身不救
爺娘死而脂掃雙蛾願作臨淄伎媒灼四五輩奔走顏
色歡翦布爲女衣買珠爲女冠不愛明月珠不樂繡羅
衣但求數石粟堂上無苦飢秋風聲蕭蕭揚帆違故土
揮手慰爺娘斂衽辭妯娒篋有刺殘繡妹長爲花絢囊

有未裝繇弟寒爲短襦女身浪中萍女意水中石一笑
赴清流紅顏殉深澤里老聞風驚家人招魂哭至今廣
陵城過者悲魚腹我欲竟此曲此曲促且哀年年女貞
樹花落孟家臺

孟母臺在
文安城東

署齋曉起

雨霽緒風和溼雲孽高嶺農忙吏庭閒滿院青山影曉
起檢舊書哦誦消日永簷烏啄槐花綠陰生晝靜遐想
東菑人腰鎌散烟井

別鄒平士民

桑下戀三宿况乃半載留予本菰蘆人承乏來梁鄒吏

民憐官拙數月安耕疇懦未翦邑弊力安甦民憂惟此
不欺心持之對爾儔今當受代去檢點懷抱羞夙志尙
自負吏治奚云修報顏辭父老延佇鯨溪流

西南諸山水小清匯下游自塞萬丈口道隘不容舟大
河口東下恃北徑尺溝近歲藉天功灤濟安瀾流仁梁
數萬戶糴裕肥車籌蕭鼓喧秋社風暖恣恬遊湖灤日
淤淺犁鋤紛雜投利爭肩睫間百歲病未瘳疏鑿不及
勢宰官多杞憂

若木枝扶疎乃在碧海東皎皎明月珠不產滄瀆中希
文古人傑少歲甘固窮至今畫粥廚遺蹟留禪宮伏生

授經處芳草仍青葱冥邈九十年俯衆如兒童羞侶刀
筆椽功狗稱三公若非鼂大夫抱經將長終士品苟未
卓絃誦吟候蟲梁鄒二百載鄉塾成荒叢嗟余負夙約
時迫難爲功敢將昔賢轍爲爾多士風

小忿貴自忍好訟終傾衰孝子與順孫詎出胥吏家持
符下鄉閭如虎生爪牙詞證往復還數日集縣衙曲直
未及析先已荒桑麻絲粒鋤頭蓄揮霍供狹邪谿壑倘
未贖呵訾競相加勸爾息訟歸老死門無譁湖濶八九
月蘆荻開白花織席易鹽米赤足撈魚蝦編蒲雜紡絮
兒女喜喧哇涼夜四天靜笑語出蒼葭何似縣官庭鞭

錐聲紛拏

游掖縣道士谷未及老子祠風雨驟至遂返

兩崖闢若門亂石扼其吭飛溜瀉石間突兀激雪浪逆
作怒猊蹲陡與渴蛟抗霹靂無停聲波濤非一狀磴削
逼趾懸岸峻眩心蕩絕徑俯天門四面松蘿障雲氣生
峯腰截然吞半嶂參差叢祠簷時露蒼茫上老樹挾陰
風鱗爪紛相向咫尺變晦明身墜雲海藏寒栗不可留
揮手幽情快透迤屢問途歸涉怯新漲回望修道廬烟
際聞樵唱

寒促冢

奸雄亦奇人，朽骨存千古。伯靡老蓋臣，不聞留寸土。高
冢時寒亭，村巫薦醕脯。篡逆疊相殘，初鑿混沌譜。六朝
延五代，斯應祀鼻祖。血食三千年，窮鄉孰敢侮。惶恐曹
阿瞞，疑冢紛漳潯。

踰南山尋百脉泉飯田家

茂樹引村蹊，數折得山徑。溜穿修竹根，潺湲瀉石磴。茅
茨堆浮嵐，蒼翠無餘賸。水膩稻苗森，岩瘦苔花孕。過橋
探名泉，入寺獲奇勝。迸翻萬斛珠，離離媚深靜。小憩張
公池，夕陽間清磬。

水磨激飛流，籬角暄朝昏。繡江十數里，曲折隨山村。葦

葉護斷岸野蔓延柴門耕樵日暮返雜坐無寒溫邀我
窗下飯白酒傾瓦盆爲話中麓堂指說南峯根緒風天
末來烟景青無垠

石經峪

緬林盤寒虹松崖闕神蚪是誰鑿坡陀波磔大如斗般
若貌菩提文猶識八九似將西竺靈付茲東岳守龍象
踏烟巒精光透瑤珞冰坼石稜青苔蝕古花黝上方石
經洞深仄護雲牖野火燒不開奧窔真難扣此乃一片
真獨向羲娥剖狡獪知文人好奇示來後多事聖經鐫
小儒矜敝帚

石有明人刻
聖經一章

至道本兩忘清泉滌煩垢空

亭寂無人潺湲逗秋瀏

平陵城

旌旗獵獵東州紅
封羊炊黍迎義公
四十八萬領符烈
悲歌猶唱平陵中
大誥聳牙討鉅嶽
妖狗突舞長安宮
惜無先見誅宛令
徒令豪語聞陳豐
青燐夜半泣殘堞
燕麥終古開春風
何處飛來兩黃鵠
陂塘流水聲淙淙
紛紛十世殘棋劫
前驅已異昆陽捷
英雄雖敗亦快
揚州都督徐敬業

樂陵五歌

赤星照分盆森芒
白虹畫貫三台旁
百年無罪語徒苦

勅字已上涼風堂手握玉玦七寶光
斛律家兒美且莊
離鸞寡鵠哀何長化爲枕畔雙鴛鴦
鄴都流水悲湯湯

樂陵千童城

寰宇志云徐福將以童男女入海秦築此城以居之

避秦何必武陵地狡獪徐郎小遊戲
峩峩大舸擁千兒
要問扶桑開海市後車風吹鮑魚腥
蛟宮夜宴酒未醒
驪山笑看然楚火逐鹿不到東滄溟
千重城邊日初杲
如瓜焉得安期棗可憐赤帝亦登封
羽衣夜上白茅草

岱頂雲海歌

昨泛東海頭破浪凌清秋
三山不知幾萬仞倒作碧玉
隨天流今登泰山巔
乘蹻披素烟罡風吹天色
破碎劈

空朶朶開青蓮夜半火輪起崖際天雞鳴雲中之君紛
紛而來下萬里又到東海溟濤勢輪囷百千狀一一漢
武封中生初猶參差露遠嶠齊魯餘青仍未了倏然塞
滿閭浮提摩蕩晴霄曠陽烏浴日亭子架絕壁玉盤擎
出青螺小仰視天容開蔚藍淨洗無纖埃俯視但蒼茫
九曲怒瀉銀河來起伏天矯態濃厚映日片片金鱗排
下界兩急晝方晦大笑應作空中雷腳踏渾沌胎手扶
柳粟子咫尺蓬元宮翩翩北海使東方雲氣空復空屢
市變幻須臾功尙可顛倒蘇髯翁何若騎麟披髮朝金
虹躍身太乙仙槎中古來登者七十二皇帝金泥玉牒

未必人人遊戲驅使神豐隆

南溪寺

茅覆數間屋南溪水色中時攜松麈尾來坐藕花風僧
語涼陰午雞聲籬落空蕭然忘物我欲訪採芝翁

哭王壺 有序

臺蘇橋里人幼隨母傭馬主政家見書輒喜稍
長聽主人讀遂能文馬君遣就童子試冠軍於
遇之滌河閱其文堅勁有法度年十八以察歿
歿時猶持書未置云

黃公墟下淚幾度染征袍 去歲周墟長文學郎小
宋孝廉俱以少年夭折之子

復播落秋風正怒號有才同趙至無詔問枚舉玉帶年
半水招魂向暮濤

憐爾飛騰氣沈埋綺歲初行蹤傳客作生死託殘書斫
地歌猶憶依劉事竟虛數言貽好事幽壤意何如

寄送彭藥谷歸湘鄉

之子去南國西風生緒波離懷湘水遠秋思楚雲多小
住辭吟侶云歸訪舊阿嗟余滯荒郡遙夜獨悲歌

郊行

歷下秋風老茫茫客徑燕野花邊習墓胡餅蔡姬墟吟
嘯懷先輩風流付酒徒夕陽千萬疊多是鵲山湖

友人處得福山鹿雪樵詩一卷格近司空表聖讀
竟因題卷末雪樵詩法得于高密李少鶴先生

先生官粵西與小癡家奴游故詩中及之

每望中條壘長吟水部詩儘多雲水境評賞暮花時逸
韻成連操孤蹤楚峒寥寥幽迴意海上幾人知

睡欲拋君卷挑燈復苦吟幾榻窗月白十笏夜臺深瘦

馬盤遶海秋風去故林黔南有知己回望亂峯森

君游劉寄

卷前
輩門

薄宦苦無緒遠遊君未歸舊時名不識到此蹟相違荒
島茅茨老開田筍蕨肥他年聞剝啄是我即柴扉

百粵瘴江流風生桂樹秋蒼茫懷少鶴嘯咏過潯州會
說題詩徧猶傳作畫留通家餘我輩重感畔牢愁

夜話贈福山王二書田

寥落雙蓬鬢風塵數腐儒歲寒同作客閒話此圍爐太
史吟初就

謂馮菊人
庶常

殘年興未孤簷花兼細雨重寫鄭虔

圖

之罘山下屋水木鬱清妍鳥篆秦朝石魚租海上田小
吟攤飯後微醉養花天此樂余曾慣相看憶往年
斗絕東牟國羣峰到海開潮傾蠻島嶼雲合蜃樓臺落
落筇枝卓茫茫釣艇迴棹州風雪夜細爲話蓬萊

醴泉寺

范公有遺蹟禪舍傍秋岑一徑亂紅葉數峯生夕陽齊
梁殘碣盡樵牧野蹤深更問書堂路寒流鳴玉琴

贈陳少穎

百年文酒共襟期廿載風流苦不支人去左徒芳草怨
路迷叢桂小山移

謂陶雪桂
山雨先生

爭言白馬能持論遊莫黃

塵解唱辭風雅已拚成歇絕那知重讀也生詩

碧海心期萬里遙徐家新調豔南朝綺思無奈傳銀瑟
好句多情寄玉蕭蜀市薄遊裝草草樊川春夢影迢迢
不堪哀樂中年事疎燭寒窗話寂寥

酒痕狼藉雜征塵落拓青衫南北身故里一尊仍是客
倦遊十載又驚春錢刀自昔傾燕市版刺憑誰問要津
令僕紛紛君解否望諸臺下也傷神

用其自撰
也生傳句

河間道中

九河東下河間道落日停車感慨深帝子風流金冊古
美人雲氣玉鉤沈市樓依舊錢工數沽酒誰家醉不禁
回首獻陵丞相兆幾回腹痛過碑陰

時家文達公
初葬故云

周亞夫墓

家世安劉百戰功壁開細柳著雄風吳兵猝訝來天上
獄吏譁言反地中金散薄昭恩舊感侯封王信論徒窮

瓦礫已出荒塋設千歲苔花漠漠紅

袁忠節墓

六忠事往賜碑殘碧血如虹尙未乾是骨可填東廠獄
有兒能死澠池官風生墓道橫霜氣沙漲黃河走暮湍
霓蓋雲車精魄在獨攜蘋藻薦秋盤

公子官河南澠池
令死流賊之難

謁袁太常祠

壁挺誰陳虎豹關紛紛緹騎破巢還數椽祠並許忠節
一疏死攜楊應山黨鋼拚教收海內茄花肯使唱人間
驚心乙丙年中事燕客書成淚點斑

寄許橋

客掉西風雁月樓年年送別感深秋尊前瑁燕臺酒
夢裏風烟粵海舟舊技亦曾羞篆刻新詩何事寄窮愁
相思如過南溪舍爲說安仁欲白頭

夜坐聽周二南話其兄弟從軍事

征南馬革英雄事今夕重談意轉悽數載烽烟斜谷北
一家兄弟劍門西空營白日青燐語破宅春風怪鳥啼
我亦腰弓燕塞客不堪同此聽荒雞

龍山道中

車蓋恩恩襪襪蹤黃沙撲面笑塵容暫將溽暑消團扇
儘有閒雲作遠峯廟砌打包眠野客槐陰團飯話村農

羣山長白東來路好向空潭咒毒龍

廣固

亂山邈邈古城垣餘燼南燕舊建藩太傅死生留海國
宋家經畧此中原風雲氣湧旌旗動樵牧人歸鳥雀喧
眼底六朝興廢事五龍渠水瀉潺湲

山村

雁齒橋橫渡曲塘虎皮石剝露村牆山田似磴分層綠
溪樹無名作陣香檐上椒絲初散集榨頭柿酒正浮霜
兒童處處癡頑甚笑說衝泥客騎忙

曉過平原

古道浸晨露氣濛陰陰桑柘徑微通積縣聲靜茅籬月
煮酒香濃柳店風漢室星辰留曼倩唐家仙蛻問顏公
買絲何處平原客羸馬徘徊感未窮

贈沈丈紹聞

悲歌回首棧雲高曾侍征南著戰袍轉粟蠻山秋坐甲
論功鐵帳夜揮毫窮邊雪爪迷遊蹟久客霜華點鬢毛
此日津門同落拓脊深重撫赫連刀

李汝霖

汝霖字說旃號西塘永年人嘉慶三年舉人

惜花

嬌羞無語索溫存幾度風狂欲斷魂
滿地落紅千萬點
看來都是淚珠痕

沈士焯

士焯字堦三號秋羸天津人嘉慶四年進士官

福建上杭縣知縣有閩海詩存

津門詩鈔堦三少穎慧弱冠騰文譽爲邑侯李
海門先生所重莅官好開揚幽潛士民懷之同
邑周大迂先生遜趨是策以唐賢少陵右丞襄
陽明高青邱四家爲宗堦三詩學得其指授幼
時雅愛溫李好作無題
詩中年以後頗變其習

秋日與韓友梅昆仲游法源寺

入山非拜佛靜境愜幽尋
石徑秋陰薄松門落照深
泉

聲清客語雲影空禪心歸路烟鐘晚徘徊古碣陰

題陳稼軒萬里壯遊圖

自有四方志心輕萬里游秋風來荔水春雨夢瓜洲客
路依琴劍雄才託倡酬京華一握手十載媿淹留

長夏卽事

開窗面鄰壑雲積與窗平高樹連空翠疎蟬送晚晴客
懷當夏健詩思已秋清坐入虛堂寂風傳鐘磬聲

題濮子畊帶月荷鋤小照時將之廣陵

十載京塵裊春愁與客愁前身定明月歸路說揚州
肝膽逢人盡雲烟落紙收

子畊書
隸書

耜耕曾有約可許並圖

不

秋日早行

高柳咽鳴蟬荒村欲曙天
殘星留遠樹野水亂晨烟
草露知秋氣風塵失少年
微涼和斷夢驚起寺鐘前

過連城縣

昨日別長汀今來此暫停
宦途南北轍人事短長稭
熟連村白山園一縣青
歲豐民氣靜花落滿公庭

閩清

瀟灑閩清縣都無城市喧
官宜今玉局地似古桃源
江靜羣漁出峯高一搶尊
山童無箇事當午散雞豚

舟中喜晴

轉棹浪花圓舟移古岸邊
遠山晴愈瘦叢樹暖生烟
冰落萍留石風斜燕避船
一盃還一曲清興稱江天

早發黃臺

秋曉事長征綠山一問程
野花隨意拆山鳥不知名
石湧龍蛇勢灘迴風雨聲
幾番嗟試險不道客舟輕

早發江汜

客寒方擁被舟子已征橈
雲薄猶通日風回欲上潮
遠山青不斷積霧白連朝
寂寞無他遣空江酒一瓢

過橋孔灘

蘇軾詩集卷之三十一
磊砢疑無路，彎環又一灘。石稜森絕壑，風勢挾奔湍。古
有登舟戒，今知行路難。扶危憑衆力，回首海天寬。

黃州城外阻雪

黯黯天空滾滾江，黃州城外泊吳艫。客心愁絕詩難遣，
節候寒深酒未降。亂雪因風穿艇戶，凍雲和夢罨篷窗。
時平闖闖如村落，不聽山城夜吠龍。

登黃鶴樓

危樓夕照遠山銜，水影空明鏡啟函。人語亂喧連夜市，
江風不斷四來帆。仙隨黃鶴去何久，詩有青蓮句可芟。
今古蒼茫搔首望，烟檣如薺露緜緜。

途中書感

經年于役守孤蓬
轉羨居人柳市東
夜雨魚蝦瓜蔓水
曉烟蜂蝶麥花風
盟心空許連城壁
問舍曾無半畝宮
多少雲烟供白眼
幾回身世感雞蟲

憶杭州

最憶江南四月天
滿街梅筍不論錢
稻畦雨過聞啼蛤
榕院宵深叫杜鵑
暖日誰家和酒藥
香風幾縷焙茶烟
六年簿領怱怱過
回首依稀在目前

自都旋里重過八里橋

柳下風柔水不波
秋光侵曉到殘荷
緇塵撲帽催征馬

黃葉盈灘護浴鵝酒熟莫分賢聖品情深聊唱去來歌
十年八里橋邊路依舊青山送客多

過黃州

哀雁枕邊幽寒江雨不休嘔啞數聲櫓播夢過黃州

當城

衰柳斜陽一棹遲殘秋無處不宜詩呼牛笛急烟橫野
趁市船歸水半籬

王家泊

蟹舍漁莊隱隱鐘烟溼極浦睡魚鷹數聲船笛參差起
風外誰家唱采菱

林天培

天培字仲因大興人嘉慶四年進士歷官廣東

惠潮道有又一村吟草

廣東通志天培已未成進士改庶吉士以兵部郎出爲惠潮道潮俗喜械鬪明示例禁復招紳耆令其轉相勸諭鬪風少戢是時盜匪聯鯨海面漁鹽各船被虜者輸其米石求脫且得原值制府檄令沿海開隘譏察諸船出海約計人口時日毋得多齎糧天培曰絕盜口糧其法固善恐不得食則勢將內撲防禦未集民受其殃矣乃親歷沿海諸地修墩墩練軍實於要害處所添設礮臺營汛兵弁爲防堵計遂以積勞卒初天培嘗請調撥師船數十號停泊放雞洋旣可爲南澳聲援亦可絕閩粵盜艘之會哨其言卒不見用未幾福建提督李長庚追勦蔡牽至黑水洋面將成擒粵盜適會哨益其勢而長庚反殞命焉潮人多天培有先事之明立祠海濱祀

之

新秋雨後作

秋光最好是江南
雪膾鱸魚霜破柑
憶得孤舟明月夜
綠楊城外酒微酣

國朝詩集卷五十五

終